

四庫全書

集部

欽定四庫全書

集部

粵西叢載卷三

詳校官庶吉士臣瑚圖禮

主事銜臣徐以坤覆勘

總校官庶吉士臣朱 鈐

校對官庶吉士臣吳裕德

謄錄監生臣宋學瀛

欽定四庫全書

粵西叢載卷三

桂林府通判汪森編

范成大駢驚錄

石湖居士以乾道壬辰十二月七日發吳郡帥廣西泊
舟姑蘇館十七日至湖州十九日遊北山石林乘輕舟
十餘里登藍輿小憩牛氏歲寒堂自此入山松桂深茂
幽絕無塵事過大嶺乃至石林則棟宇傾頽兩廊盡折

去成菜畦矣正堂無恙亦有舊牀榻在凝塵中堂正面
十山高峰層巒空翠照衣袂略似上天竺白雲堂所見
而加雄尊自堂西過二小亭佳石錯立道周至西巖石
益奇而多有小堂曰承照葉公自玉堂歸守先隴經始
之初初有此堂後以天官召還受命於此因以為志焉
其旁登高有羅漢巖石狀怪詭皆嵌空裊綴巧過鐫剝
自西巖回步至東巖石之高壯礧礧又過西巖小亭亦
頽矣葉公好石力剔山骨森然發露若林而開徑於石

間亦有自他所移徙置道旁以補缺空者方公著書譯經於堂上四方學士聞風仰之如璇璣景星語石林所在又如仙都道山欲至不可得蓋棺未幾而其家不能守委而棄之灌莽叢薄間遊子相與徘徊歎息不能去或謂此地離人太遠岑蔚荒虛非大官部曲衆多者難久處又云公沒後山鬼搶攘暮夜與人錯行婦子不能安室故諸郎去之云出石林飯旌善寺葉氏墳祠也雲川有兩玲瓏山石林為大玲瓏又有小玲瓏在長興縣

界路口聞其山尤勝小玲瓏今屬沈氏沈氏之父死二
子幼芳檢校於官此山石色微黃而更奇古一丘在空
中洞穴十數皆旁相通貫故名玲瓏泉聲瀉壑磴中竊
如深谷堂前小池石如馬虺隤其中池後山屏上洗出
之石巖積嵌崟巧怪萬狀缺罅清泉淙泓叢桂覆其上
亭館既無人居亦漸荒廢雪川特無好事者能損厚貲
買之沈氏雖不得山亦足以豪矣杜牧之所遊玲瓏即
石林是也小玲瓏晚出而加勝由沈家步登舟回至城

下一鼓後矣二十一日宿德清縣泊舟左顧亭孔愉放
龜處也庭前兩大枯木可千年而挺立不朽德清古之
餘不地今孔侯墓廟在焉廟居墓前與其夫人像皆盤
膝坐二十三日宿餘杭縣苕溪館二十八日宿富陽縣
三十日發富陽雪滿千山江色沉碧夜小霽風急寒甚
披使北時所作錦袍戴氍帽坐船頭縱觀不勝清絕刻
溪夜汎景物未必過此晚宿嚴州桐廬縣癸巳歲正月
一日巳午間至釣臺率家人子登臺講元正禮謁三先

生祠登絕頂掃雪平石上諸山縞然凍雪不開境過清
矣臧獲亦貪殊景皆忍寒犯滑來登始予自紹興己卯
歲以新安戶曹沿檄來始識釣臺題詩壁間後十年以
括蒼假守被召復至自和二篇及今又四年蓋三過焉
復自和三篇薄宦區區如此豈惟愧羊裘公見篙師灘
子慚顏亦厚二日至嚴州泊定川館七日至蘭溪泊澄
江館九日至婺州泊金華驛十二日宿龍遊縣龍丘驛
十三日至衢州十八日過常山縣十九日宿信州玉山

縣王川驛二十五日過弋陽縣二十六日過貴溪縣二十七日過饒州安仁縣二十八日至餘干縣閏月一日宿鄔子口鄔子者鄱陽湖尾也名為盜區非使風張帆及有船伴不可過四日至隆興府泊南浦亭五日登滕王閣其故址甚侈今但於城上作大堂耳十一日過豐城縣十二日宿臨江軍十六日宿新喻縣十七日宿分宜縣十八日至袁州聞仰山之勝久矣去城雖遠特往遊之二十五日里先季惠廟廟祠兄弟二王不血食其

神龍也舊傳二龍昔居仰山中以其地施仰山祖師遷居於此廟有楊氏神稱吳時加封司徒竹冊尚存又稱保太元年余向居鄉得吳江村寺石幢所記亦以保太元年蓋錢氏有浙時或嘗用楊氏正朔此二證為甚確也出廟三十里至仰山履喬松之磴甚危巖阪之間皆田層層而上至頂名梯田晚出山復入袁州二十六日宿萍鄉縣萍實驛人以此地為楚王得萍實之地然去大江遠非是三十日宿潭州醴陵縣二月三日泛湘江

七日宿衡山縣十二日至衡州北行因隴將盡忽一峰
特起如大磯浸江中蒸水自邵陽來繞其左瀟湘自桂
林零陵來繞其右而皆會於合江亭之前併為一水以
東去石鼓雄踞要會大略如春秋霸主號令諸侯勤王
蒸湘如兄弟同奔來會稟命載書乃同軌以朝宗蓋其
形勝如此十五日捨舟遵陸登回鴈峰十八日宿永州
祁陽縣十九日遊浯溪浯溪近山石澗也噴薄有聲流
出江中臨石崖數壁纔高尋丈中興頌在最大一壁碑

之上餘石無幾所謂石天齊者說者謂或是天然整齊之義二十日渡湘水卽至愚溪二十六日入桂林界有大石表跨官道榜曰廣南西路家人舉頭驚詫以爲何爲至於此也二十八日至靈川縣又六十里至八桂堂桂林北城之外圃也未至桂林二三里泊八桂堂旬日三月十日入城交府事郡治前後萬峰環列與天無際按桂林自唐以來以山川奇秀稱韓文公雖不到然在潮熟聞之故詩有參天帶水翠羽黃柑之語末句乃曰

飛鸞不暇驂蓋歆羨之如此故余行記以驂鸞名之若其風土之詳則有桂海虞衡志焉

黃福奉使安南水程日記

永樂四年有事於安南舟車所抵耳目所得具筆於後

七月初一日入辭是日會同館起馬宿龍江驛

初二日早龍江驛起船由大勝港過茅山渡望方山詢單橋午至大勝驛有仙人磯石橫於中流其勢巉巖其

流洶湧舟人每為之震聳又有三山磯三峰聯峙於岸其峻秀可觀是夕風雨橫江艤舟於岸逮中夜而作

初三日晚至和尚港其港遶山周回首尾通江僅百餘步港之兩岸柳陰茅屋豚柵雞埭儼然如市次至黃蓬磯獨一山枕於江岸又之響糠礪磯有觀音洞又南之雲頭磯雲峰侵冲漠狂瀾回注舟子莫能支沿崖而擗者蟻附又之驚兒磯山青雲白耕牧雜然於下有政平訟理之氣象又之望夫磯其山連亘僅一里怪石巉巖

芳草叢綠又之采石驛時將及午入支江上有李白墓俗謂此地多旨酒以故居者樓閣重重臨流而市酒者比他率多又南二十里觀黃山又二里許望太平皆出支江之左也又三十里許曰東梁山在大江之左支江之右山勢甚怪西梁山又在大江之右與東梁山相望其勢相若此處出支江入大江亦扼要地有大信巡司在焉治居支江之左暮泊黑山磯是夕風雨大作中夜而興

初四日早至櫓港驛風雨如昨驛治在江之東岸近荻港有板子磯如采石支江抱一小山而南行十里許與大江通磯之東約五里荻港驛在焉是日申時至驛晝夜兼行

初五辰至大通驛其驛亦在支江之東南約數十步與大江合暮至池口驛是夕天清月白風息波平鼓枻而南如有助者

初六日五更至李楊河驛入長風夾傍有小徑舟子得

以牽輦辰至安慶同安驛泊舟於張家港港西岸有嶺
林茂地僻時將未遂為文於是嶺之巔祭其故庶子南
保而行其文失矣

初七日平旦之雷港驛過急水溝仍乘風入江一帆輕
快過彭郎磯望小孤山已而至龍城驛彭澤縣側有狄
梁公祠堂在焉而陶潛像亦置其右龍城發棹日將暮
矣

初八日辰至彭蠡驛有湖口縣治在驛之東北過鄱陽

湖口江水湖水於此合流而下南望廬山隱隱在雲霧
表而不知其高下也湖水中有一鞋山峙焉中流特立其
勢類鞋名取此也江流西上有南湖背山巡司在焉午
未至潯陽驛九江府治在焉由支江而南東望廬山最
近問人云約三十里山外南康所隸山之中有竹林等
寺山之側有五老等峰而周顛仙碑亭災之後而今見
興焉夜行如昨

初九日辰至富池驛驛隸興國州午未至蘄陽驛隸蘄

州

初十日曉至蘭溪驛江岸有路牽者得行過赤壁望黃州不午未至齊安驛驛在黃州府城外與遞運所連枕江流舟行未十里風雨大作冒行不已

十一日卯至陽邏驛驛隸黃岡縣過午至夏口驛驛在武昌城外舟次於驛前報名於典儀所

十二日早入見回時將辰遂放舟而南午未至金口驛驛隸江夏縣風順帆輕篙者咸有豫色逮暮至蘄州驛

驛隸嘉魚縣舟行過半夜至魚山驛驛亦隸嘉魚縣自金口驛以來湖水瀰漫多與江合吾舟悉由湖而行帆拂蘆荻花棹穿菱芡實水閒風順無洶湧之虞亦甚樂也

十三日辰至石頭口驛驛亦隸嘉魚縣舟亦從湖水徑之鴨欄驛時將交申驛之前有石如砥柱峙於邊流轉而南有鴨欄磯又尋之白馬磯鴨欄比之白馬山高水急舟者未免用力驛之右有茶引批驗所及臨湘巡檢

司三衙並枕江流俱隸臨湘縣又南有楊陵及臨湘一磯暮至城陵驛越十五里許過巴陵縣望岳陽樓君山扁山峙於西南如中流砥柱焉時風順月明波濤不作湖之行如履平地過夜半舟至鹿角驛驛在湖山之東以水急舟皆集於驛之南小河之所去邑一里許遂乘風挂席而南斯驛隸巴陵縣

十四日日將出至磊石驛驛之左有觀音閣閣之左有龍神祠祠側營涵虛一亭亭之壁有竹木之畫騷人詠

唱筆迹率多如迸珠迸玉殆不可以斯須徧觀也是日出洞庭已時至營田驛驛隸湘陰縣過未時至筌竹驛驛亦隸湘陰縣縣治在驛之東南去泊舟之所不遠治縣者未之見不知其為人舟遂行至申末至彤關驛驛隸長沙縣驛背小山竹木森然驛前有樓曰凝翠倚山枕水可縱游覽遂挂席而南是日夜將半舟至臨湘驛驛在長沙府城外驛隸長沙縣

十五日早入見遂辭而行至申末舟至湘潭驛驛隸湘

潭縣縣治在驛之後北去約一里許舟行過半夜至淶口驛驛隸長沙醴陵縣驛治可觀行三十里空洲在湘江中流江之兩岸花木參差禽鳥咬嘎游子騷人吟懷旅思於是未有確然而不動者也

十六日辰末至泗洲驛驛亦隸醴陵縣暮至都石驛驛隸湘潭縣夜半至皇華驛驛隸衡山縣驛至縣十五里縣有南嶽歲時享祀

十七日卯末至霞流驛驛亦隸衡山縣未時至七里驛

驛隸衡陽縣驛之北有七里灘俗云漢嚴陵曾釣於此
詢無遺迹暮至臨蒸驛驛隸衡陽縣衡州府治在焉驛
治在府之城外北門放舟夜行驛之下三四里許一水
自西北來通寶慶一水自東南來通郴州耒陽縣

十八日辰至新塘驛驛亦隸衡陽縣驛週迴皆有渠引
水養魚生意可嘉已未至栢坊驛驛隸衡州府常寧縣
夜至河州驛驛隸常寧縣

十九日早至歸陽驛驛隸永州府祁陽縣申至三吾驛

驛亦隸祁陽縣此驛問至方湫驛有九十里夜行如前
二十日卯至方湫驛驛隸永州府零陵縣是日申時至
湘口驛驛亦隸零陵縣去永州府城十里許驛之東南
一水通道州驛之西北一水通廣西二水至驛合流而
北是夜泊舟於驛前

二十一日早行未至石期驛驛隸永州府東安縣湖
廣地方界分於此南至柳浦驛以往隸廣西

二十二日丑至柳浦驛驛隸廣西桂林府全州驛西行

四十餘里有黃沙市河設浮橋連橫於水上司橋有判官倉使老人是日未時至山角驛驛隸全州

二十三日早至城南驛驛隸全州是日申末至白雲驛驛隸桂林府興安縣縣去驛半里許驛之南北設陡三十六所驛以北陡十水流而北驛以南陡二十六水流而南每處設軍二人守之船過則放開

二十四日五更至大龍驛是日未初至東江驛館於紫極宮報名典儀所

二十五日早見免禮

閏七月初五日報名典儀所

初六日蚤辭免禮是日午後遂行至南亭驛驛至臨桂
七十里隸臨桂縣驛之前有榕樹一本九枝其根盤錯
延袤甚遠其陰婆娑殆有頃餘人云自宋有之近五百
年餘

初七日旦時至古祚驛驛隸陽朔縣遠有一百二十里
午後至昭潭驛驛隸平樂縣遠一百里有平樂府治平

戶所治在焉申時至廣運驛驛隸平樂縣遠一百里是日戌時至昭平驛程一百二十里隸平樂縣

初八日卯時至龍門驛程二百四十里隸平樂縣午時至龍江驛程六十里申時至府門驛驛隸蒼梧縣梧州府治千戶所治在焉驛之程一百二十里

初九日巳時抵藤江驛驛隸藤縣縣之令有曰周願者聞有政聲驛之程百一十里是日戌時至黃丹驛驛隸藤縣程百二十里

初十日午時至烏江驛驛隸平南縣縣治去驛不遠程百二十里

十一日巳時至府門驛驛隸桂平縣潯州府衛治在焉程百八十里此驛西有山曰西山去縣四十里林崖深惡人所罕到猺獞居多每與大通峽獞人合力剽掠居民受害甚可惡也至暮發舟

十二日戌時至東津驛驛隸貴縣程八十里

十三日卯時至懷津驛程百六十里隸貴縣有縣治千

戶所在焉

十四日辰時至香江驛驛隸貴縣程八十里申時至烏蠻驛驛隸橫州程八十里香江之來烏蠻灘水險惡有十里餘逆舟頗難名曰烏蠻灘

十五日辰時至州門驛驛隸橫州州治與馴象衛在焉程百八十里是日午後開船

十六日午時至火烟驛驛隸橫州程八十里驛之北十餘步許有灘曰雷霹水甚險遠舟人每先繫纜於岸之

樹然後沿纜而進已復解纜而去繼者復加之人勞事
滯計無所出特命驛與永淳縣置大纜系之便於舟人
是日戌時至永淳驛驛隸永淳縣程百八十里
十七日酉時至黃范驛驛隸宣化縣程八十里
十八日午時至建武驛驛在南寧府城之南有衛治在
焉程百二十里住一日半

十九日戌時發舟翼日辰時之左右江水合流處
二十一日午時至凌山驛驛隸宣化縣程四百里奇

二十二日午時至大盧由旱路行夜亦行

二十三日蚤至太平府館於千戶所與大理陳公給事
馮公僉事杜公同事務共炊爨

九月初三日早先來龍州整理事務行約二十里有老
軍王英追報馮給事軍前回還就復回太平

初六日蚤起馬來龍州夜暫駐於蹬勒驛尋即夜行達
旦至龍州館於頭目王二之空閣

十月初五日軍前令隨前進議留黎主事杜僉事理龍

州糧運事愚與大理公給事公遂行先之馱海度糧運之難不可離去復於軍前白准仍留領督館於憑祥縣廳事事頗有緒遂復往軍前

二十一日早起馬前進是日午未至坡壘關宿於都督韓公之營

二十二日蚤行午過丘溫堡暮宿於丘溫南二十里王都司行營

二十三日早行午過隘留關此關賊之塹壘尚在其險

興於他隘暮至雞靈堡

二十六日早行暮至隘龐關宿於陳都司營

二十七日蚤行晚至芹站堡宿於張都司營

十一月初九日起馬至昌江小堡宿

初十日午至市橋堡

十一日早行於呂都督營宿

十四日蚤至大營白議事畢

十八日復回暮宿於野

十九日至市橋堡宿

二十日晚至昌江堡宿

二十一日至芹站

二十三日至雞靈堡宿

二十四日晚至丘溫宿

二十七日起至坡壘宿

二十八日至憑祥縣仍治所事

田汝成桂林行

予世勤農圃少隱丘樊步武不出閭里之間聞見不越
簡編之事迨乎弱冠濫廁鄉書伯仲計偕觀光上國譬
之潢鱗縱壑谷羽騰霄益已心曠神馳恢弘壯膽矣迺
今竊祿一紀沿牒九遷內陟兩京外歷三省匍匐州郡
之末跋涉嶺海之交總凡往返於京師者一十有二留
都者四南海夜郎者各二矣雖蹤迹未遍於埏垓而耳
目已超於圭筆况乎瑰山怪水艱苦備嘗露宿風餐形
容漸槁追陳蹤於疇曩永歎歎於來茲譬彼雪鴻同諸

石火不有述作曷考所由是以靈運牽絲載謠東道安
仁憑軾爰賦西征皆以寫玄覽於一時理羈愁於異禩
者也予既慨往事之莫稽幸今遊之可述廼因廣右之
役載筆途次條刺日程雖體式不襲於前賢而話言必
核於真見嗟乎予長遠涉江淮大肆文章之力少游屬
情款段不失愿慙之名雖趣向不同而分量各得廼予
行能綿劣運命輒軻進不攀龍見之英退不比蠖屈之
彥玩愒日月汨沒塵埃悼徃懷來抵增侘傺爾書藏篋

筭以諗兒曹嗣有行遊編次左簡

嘉靖十七年予自京師還家稍遷廣西布政使司左叅
議服侍二親不勝違戀徘徊桑梓奄忽判年將以七月
七日啓行或言辰值孤虛七殺當道不利舟車家人難
之予曰陰陽者家胡可泥也明王敬授人時率作興事
而已屑屑忌諱使人多畏豈治厯者之初心哉曩歲南
都秩滿換日言歸已而大雪載途夙期竟爽膏車霽發
或言辰值往亡而歸心刺促踣蹙宵行抵家無恙安在

其往亡也。迺今憑程已棘，義不可需，遂以是日祖南城。
親友罕覺，匆匆飲餞者，江十丈陸子中而已。同登六和
塔，未及二層，而徐九丈徐孟文、江子京追至，攀躋絕頂，
旋覽江湖，命酒高談，離愁都豁。塔中有宋湯思退、賈昌
朝等彙寫佛說二十四章書法，殊體步驟，鍾王南渡君
臣荒度游衍，茂恢復之心，此亦一驗也。惆悵久之，已而
疊岫銜規，林颿颿憑虛，遠眺渺若凌雲，興盡而休。時
亦逮暮矣，洗簪於噴月泉，滿引三行，抗手而別。是夜四

更發舟翌日巳卯過富陽會知縣龔善治乘風行二十里宿湯家埠庚辰過桐廬會知縣何經遂游桐君祠乘風行三十里宿嚴子陵祠下攜兒藝衡登釣臺時月色滿江蒼烟盡刷寒露淅淅墜草間隔岸越山咫尺可數亦奇觀也辛巳過建德會通判潘嗣冕儀是夕宿三河壬午過蘭溪訪董鵬鵬以孝行辟舉授思南府推官曩予按察思南禮之加等既予東歸而鵬亦引年解職矣行二十里至新埠宿焉癸未過龍游龍游春秋姑蔑子

之國也傳言越代吳而王孫彌庸見姑蔑之旗是已其
城墟在穀溪之南行二里許登翠光宮俯瞰晴江濃綠
可染還舟風雨大作又三十五里宿安寧鎮甲申謁趙
清獻公祠祠濱河去縣二十里午過衢州會知府李邦
良遂府治故有土埠壅庭號小蛾眉峰或言郭璞墓也
遷之不利太守且郡多火災至者遞封殖樹大如斗李
君欲遷之吏民懇祈弗許竟遷之掇得石笋一枚長六
尺許勒云唐乾符中刺史李穀置葢玩具也歲久湮沒

土中形若覆釜遂訛為郭璞墓云乘風行二十五里宿
石塘街乙酉至常山會知縣吳襄游集真觀觀有閣憑
虛特立最宜登眺遂遊白龍歸雲二洞白龍洞懸泉滴
瀝莫測其源洞口架屋三間乃開化方思道豪倡義營
構者水活活循除行出滙深潭傍有巨石垂入若渴虬
之狀循白龍右崖迤邐數十步為歸雲洞窈黑非秉炬
不可入其名則晉江梁宅之懷仁所勒也宅之才子嘗
識面彭城睂目姣好摘辭或如舉進士踰年而捐館王

勃李賀之悲古今一揆矣惆悵久之丙戌早發常山午
憩草萍驛驛南里許有坊曰兩浙雄鎮過此則江西界
矣薄暮至玉山是日中元節也月色皎朗攜兒露坐鄉
思悽然夜分乃罷丁亥早發玉山濱河有坊曰八省通
衢乃李先生時行巡按時建而予為碑記者溪水淺澀
以小艇昏黑抵廣信會知府趙振夫鏜同知徐尚賢官
是夕艤宿南門鄒謙之守益應檄北上邂逅月下坐浮
橋而語戊子訪給事中呂惟德懷徃予刑曹時李君以

貢士歷事又與謙之論學新泉別且十年矣亭午發廣
信過錢倉石石圓如毬浮突水面高可十丈相傳有漁
翁泅石下得古錢一斛遂以起名而土人又稱捲績石
也乘月過黃龍灘宿鉛山河口已丑過弋陽誌言地多
禽魚弋者叢集因以名縣或曰山有巨石礪如弋文或
曰溪流如弋薄暮至貴溪會知縣朱默庚寅訪諭德江
茂穀汝璧寺副江于春以朝薄暮至安仁會知縣陳慶
朝辛卯至餘干餘干者餘水之干蓋吳楚越三水之餘

也故又名三餘士辰至鄔子驛風作不克行癸巳發鄔
子八里許為鄱陽湖口時風止波平淼渺萬頃遇河南
參議周大卿相停橈移時別去至王家圩宿焉甲午至
南昌會巡按御史景濟之漆布政使夏舜俞邦謨參政
潘薦叔潢參議王在叔璣按察使劉士奇儲秀副使陸
肯堂堂徐子升階僉事徐朝重萬璧知府程仲朴資知
縣吳瓊年朝宗頃之覲巡撫都御史胡公岳遂遊滕王
閣閣臨章江之左雖宏麗已非遺構而南雲西雨之景

彷彿見之還入鐵柱觀晉旌陽令許遜斬蛟之所也遜
善以道術禁治妖蠱時豫章有蛟害遜飛劍斬之穴地
立鐵柱施八索以鎮地脉出地二尺有咫水怪屏息還
謁徐孺子祠祠在東湖南洲乙未弋陽王以詩畫來遺
且曰寡人願有請也遂往朝之設宴便殿出解大紳遺
墨一帙風骨婉媚逼真子昂嘗在吳中閱解帖古拙似
紫陽體心固疑之始知偽售惑真者不獨一解帖也丙
申早發南昌過市汭驛風雨移時而霽至長湖宿焉丁

西過豐城城西南三十里為劔池池前有石函長六尺
廣半之張華雷煥掎劒之所也戊戌至新館距臨江府
治十五里水涸舟膠知府李仲占易來訊己亥至新淦
淦水發紫淦山入於章江別有金水與淦水異源而合
流所謂金川是也庚子家君誕辰焚香率妻子遙賀乃
發至峽江峽江故新淦地嘉靖五年分建縣治於此訓
導譚敷來見辛丑仲秋朔早發峽江至吉水吉水者吉
文之水也為贛江支流曲折洲渚間狀若文字以為吉

祥故以名縣士寅早發吉水過螺山謁文丞相祠午過廬陵會通判汪堯卿舟所鐵十字一枚題曰保大二年五月置重一千三百斤相傳南唐造戰艦以此係纜者乘風行三十里宿張家渡宋名將康保裔祠在焉癸卯至淘金驛十里許宿素吉渡甲辰過泰和會知縣廖師文世魁遂登快閣時秋霽天高澄江瀟望是夕宿浩溪驛乙巳過萬安自此至贛縣溯流三百里間為灘者一十有八頗磯齒齒星散波中或起或伏舟行其間曲折

趨避稍與為忤靡不顛淪而天柱皇恐二灘尤甚綿絡里許石骨崢嶸舊有二十四灘五代時贛水大發乃沒其六云是夕宿蓮津丙午乘風過阜口攸鎮二驛宿石人埧夜雨達旦丁未冒雨至贛縣贛縣在唐宋時為虔州紹興間有寇警以虔字虎頭所兆乃以章貢二水合流名郡為贛也貢水出汀州新樂山章水出南安聶都山二水東西流合於城北本瀨字而省作贛然瀨音如貢無幹音者豈方聲與時江水驟漲賴北風以行帆檣

輕矯榜人歡呼若神助者會副使侯世言緘知府康德
清河通判謝俞卿邦信戊申覲巡撫都御史王公德深
浚遂遊天竺山舊有寺為韜光禪師所居白樂天有詩
懷之蘇子瞻所謂香山居士留遺蹟天竺禪師有故居
者是也已酉登鬱孤臺臺高數仞水光山色盡出几席
履舄之間趙抃詩云羣峰鬱然起惟獨此山孤是也庚
戌萬壽聖節行賀禮於水西驛遂發贛縣自是貢水已
分至庾嶺皆章水矣不及九牛驛三十里昏黑宿接官

亭辛亥大雨至南康會知縣陳徠壬子過小溪驛三十里癸丑不及大庾二十里皆野宿江中甲寅至大庾會知府許士永繼同知侯孟學廷訓同游寶積寺壁間有張汝弼草書數十行益守郡時作者乙卯早發大庾過梅嶺漢兵擊呂嘉有庾將軍者戍此故名庾嶺以其地多梅又名梅嶺危石仄疊登陟甚艱唐開元間左拾遺張九齡開鑿成路民皆便之故有祠在焉祠旁有雲封寺白猿洞卓錫泉放鉢石唐僧盧慧能行禪之所也嶺

上有叱馭樓過此即廣東省界矣自此至番禺有建瓴水下岑樓之勢故漢武帝命五將軍伐南粵而樓船將軍出豫章下橫浦其兵先入其功居多亦地勢之利也薄暮至保昌會通判譚璣推官方表民訓導金英尤舜俞丘玉是日中秋節也丙辰雨午霽發保昌過黃塘十里許宿焉丁巳過平圃至曲江會通判秦從熙武曲江者以湏武二水抱城回曲而流故又名湘江也湏水出庾嶺武水出柳州經樂昌縣韓退之詩南行逾六旬始

下樂昌瀧者是也城南有逍遙臺隋刺史薛道衡所建
夜宿濛裏戊午遊南華寺寺當曹溪之上慧能居之故
有衣鉢存焉鉢色非木非陶沃如髹漆其光可鑑嘉靖
初莊渠魏子才提學嶺左槌之僅存方寸還過清溪至
英德會知縣吳珠教諭鄭泮訓導周本此地多怪石扣
之有聲者上品諺云峰巒聳秀崑崙分明無斧鑿痕有
金石聲此相石訣也是夕宿橫石磯已未過中宿峽峽
上有飛來寺兩山峭削中通江流午過清遠會僉事李

廷儀文鳳教諭羅勲訓導張朝是日連過回岐胥江二
驛庚申昧爽過三水至高要會同知許仕昭知縣陳豫
章教授莫磷訓導何倫徐仲叅將程本虛鑒助教諸子
興傑辛酉發高要宿六步士戍過新村游三洲崙中空
可十丈許鐘乳垂結多若獅象虬魚鐘磬之屬故又名
玉乳崙也是夕宿野塘舖癸亥過德慶會推官汪九齡
學正陳宗器是夕宿羅房羅房淥水故廣東省地今為
徭人所侵每歲逋糧者七千石矣甲子過封川會知縣

王用璽教諭諸緒訓導林賢去此十里許過清江口即
廣西省界矣是夕五更抵蒼梧乙丑知府朱鴻漸同知
陸任忠通判傅燦林祿知縣項寵教諭周文興來見項
謁提督侍郎蔡公廷彛經安遠侯柳公珣會參政林舜
卿士元是夜大雨如注丙寅雨不絕江漲益大江自西
來者為黔鬱二水黔水發源牂牁經南寧而下漢伐南
越使馳義侯發夜郎兵下牂牁江會番禺即此江也自
北來者為澧水發源興安漢戈船將軍出零陵下澧水

即此江也二江至此乃合流而東丁卯霽午發蒼梧十
里許宿廟口自此至省城皆溯灘水而行以灘名者三
百六十中有五十四冲皆徭獠出沒之所戊辰至龍江
雷雨已已宿古攬堡庚午至龍門自此至平樂則山愈
高水愈急頑磯漫渚隱見波中兩岸密菁叢林裏疏表
翳冠戎踰伏狙獠賈舶操長竿鉤舷而剽之官兵督捕
即狝竄麋跳不可蹤迹嗚呼淮南所慮豈直漢時為然
哉辛未季秋朔宿於鰲洲繁星滿天雷電不徹鬱蒸之

氣無異伏中壬申北風飄蕭肌粟憤起粵嶺氣候信難
測矣是夕宿昭平過數里許為雷陂峽已上兩岸諸山
參差骨立色若積鐵狀若植戟又如卧虎蹲獅不可射
彈草木鬱翳聯厓委谷岐岐嶷嶷茂若禾麥秋冬不零
賈舶魚貫水滸一月九關非軍麾導衛不敢徑度猱狖
夜嘯虎豹晝行數日之間不見人煙者二百餘里雖險
隘已極而山明水秀恍若畫圖亦嶺外絕景也癸酉宿
勞鹿灘甲戌宿大同乙亥不及平樂縣二十里丙子至

平樂知府蕭一中同知周訓知縣黃价教諭鄒魯來見
頃會布政使祝堯緒續副使翁仁夫萬達錢振之鐸平
樂在唐末時為昭州至元乃改平樂蓋自蒼梧而北灘
瀧險惡至是始平故曰平樂又以江水近府始迤演故
曰府江丁丑早發平樂自此已上諸山皆離離落落似
斷復連兀突平原若雕若琢瓌狀詭態不可殫論令人
左送右迎惟恐一奇之失也平樂已下山川又不足羨
矣是夕宿陽朔縣戊寅早發陽朔不及南亭二十里宿

畫山已卯早過南亭時秋霽風清桂花盛發香氣馥郁
冉冉自嵒谷中來桂林之稱良有以也薄暮宿廬田市
庚辰過穿山有穴通透望之如月輪挂空也早至桂林
時藩臬諸寮皆以公事他出獨按察使陸選之銓僉事
李稚大義壯在省徃予為儀制員外郎時陸君郎中李
君主事尋皆星散睽越者九年矣復聚會萬里外又無
他寮參焉亦奇事也頃會巡按御史鄒廷俞堯臣副總
兵張文治經都指揮使余承甫恩辛巳知府楊沔來見

壬午宿城隍廟癸未昧爽奠禱於神省寮無一在者遂
以是日到任署印自發錢塘至此凡六十四日

粵西叢載卷三

欽定四庫全書

粵西叢載卷四

桂林府通判汪森編

岳和聲後驂鸞錄

龍水客以萬厯辛亥三月初七日奉出守慶遠之命
四月十七日還里九月十七日疏請致仕十九日奉
旨下所司所司停覆復檄之任先是禮曹郎自嘉隆
來鮮以刺郡出者即間見以為俛得之矣余以客部

歷膳儀兩副郎先後十二改歲而有是命又僻在炎
徼狄狗狔狔之與處或謂不堪而心安之凡所為乞
休者非以官亦非以地也再命之至而猶抗前請將
官與地之以矣李君實以范至能驂鸞錄來贐曰君
踰嶺而後驂鸞錄成應早寄我余曰弟實戔戔以奉
使則愧攬轡以移鎮則愧吳船而刺龍水之與帥靖
江寧敢多讓文穆以負知己君實領之遂以是年壬
子正月趣裝而日記其程以為後驂鸞錄曰龍水客

者志地也

正月二十日停午偕門人周孝修登舟發西水嘉興陸
太和秀水吳儼五兩明府送之河干甫解維沈白生妹
倩以雀舫來期至學繡乃反語余曰無可贈行者飽喫
惠州飯細和淵明詩贈君止此矣余曰惠州不在天上
吾將束帶見督郵耳其幸而為坡公不幸而為黃文節
固安之若命無何許伯厚嚴圖南包彥平范長康以小
舫來余曰何以似我長康曰山如碧玉簪瘴來雲似墨

龍水距八桂五十舍距羅池又二十舍即舉似無隄昌
黎柳州者過此以往未之或知余曰宜州昔人以為地
牢推此類言之又安知不為天堂邪相與胡盧一笑彥
平屬過武林從前太平守凌元孚問嶺右風氣徭俗及
諸飲食便宜狀且述元孚當日語曰彼土山川甲天下
使君情致自不惡獨二三臧獲鬱鬱不樂岑寂耳甫別
挾探奇行至者陸三孺也少與余讀書石佛梅花洲二
十六年往矣三孺才可凌雲一青衫不屑就輒高尚棄

去余婆婆人間為時局弋慕行役不休對之頗厚所強
為余解者以嶺右山水不負客耳遂訂游武林未作別
晚泊陡門以輕舸展先墓于桑園蘭干二橋與族人酒
別

二十一日至高橋及石門而雨郁伯承來且以季父新
寧州倅蕙相屬余曰龍水客直寄公耳何能為新寧宇
下乎次語兒靳明府來語其姻家汪中宇參我方帥柳
慶故儒將也輕裘緩帶不廢嘯歌余曰我將過而問焉

發語兒而水部兄之初比部弟季有方舟至宿彭老橋
妹倩戴以介挾風雨至余襆被臥二鼓風甚黎明乃發
二十二日午泊塘棲步長橋晚且泊距關可十五里許
三十三日稍霽午入關問館于來青堂堂為同省吳儀
部別業面湖背郭從喧囂中不失閑冷

二十四日早謁先忠武王祠已展墓揖宗人于流芳亭循
桃溪出午與孟季小別同以介循九里松上飛來度三
竺禮大士于雙殿憩白雲舍作桑門饌舍舊為坡公所

顏迹之烏有矣申度麥嶺捫石間字云同游楊傑蘇軾
王翰故坡公所署葦棘中乃不為風雨蝕與以介盤桓
久之憩法相歸從金沙買小刀由定香橋循六橋與米
君夢同作客湖舫中丙夜歸來青而闇者以客刺目來
廿五日早與以介別乃入城報謁次轅門遇耒陽曾金
簡小儀約醒言于來青歸而先與余孟季宴坐久矣遂
具蔬供晤語夜分別去比部弟復呼酒醉床頭而水部
兄亦自外來把琰相向共證半生心事比部弟曰兄自

下帷攻苦及紆朝黻垂二十年無所不刻礪以有此行
蠻烟瘴雨幸善眠食欲根猶易剗名根未易除文字結
習政與名媾要之涉累猶然兒女情多耳余曰不然吾
年四十有四矣寧復能向少年場田百氏而掩雋乎第
以言吾所欲言與所能言而已言吾所欲言不欲不敢
出也言吾所能言不能不敢強也所慮欲根未易剗當
向元城先生越行後作學人水部兄曰實獲我心

二十六日辰與比部弟別及午而黃貞父施仲宣二小

儀以楫舫自湧金門至余欲放棹南屏過津公竹閣以
遲余兄故停棹中流已艤斷橋步錦塘上飛英滿地呼
平頭掇貯恬白琰中與主人隨手探得有刈辦者即浮
白補之竣事以得全多者為算勝未半水部兄至而來
青吳郎用伎樂舫來二小儀跋踈以不速辭余強乃往
未半輒去余與水部兄復促坐兩人酒不能以栢量致
過一石劇醉乃散

二十七日孫司理偃虹過訪入城報謁迫暮赴柯都運

招于柳州亭都運先守慶遠二年所代者以瘴鄉引疾去而余適遇于茲以有茲亭之酌慶即踰柳州三百里而遙肯令子厚遂作勝場語都運曰足下且以柳亭酒為慶守脂轄其縱澆之都運輟然

二十八日早命倅昭慶戒公偕霖公智沙彌以芥蘆四出來贐余紆途別乃別循城隍由表忠觀過慶樂巷訪虞勲部德園勲部先期赴貞父招遲余于竹閣至則金簡小儀陶君奭孝廉與高元玄津二開士在坐蔬供茗

飲閒房靚倩竹聲琅琅與人語相應非復曩時稠濃僧
舍矣西過宗鏡堂拾層級者三禮永明瘞塔下拜慧日
峰為宋篆雋古前此未覩也過問澄公八十臘無恙乃
上丁婆嶺望五雲最高處六和在眼三折綰帶矣晚飯
逆旅登江舟江流春漲浩淼澎湃岡巒極岸與烟霧相
迷離濤聲之所激齟齬鉅鎗鏑實難為懷推篷望西岸
則遠山層出若簇若馳與孝修嘯咏到江吳地盡隔岸
越山多之句數閱而寢

二十九日戒楫水部兄以札來余報之遲潮乃發及午
兄肩輿至余問何以戒慶守也曰弟于慶為八千里遷
人而非守也吾願弟為八千里守而不為遷人也吾嘗
語弟以情事理法四關矣四者有方有圓有礙有無礙
一入而情二入而事三入而理四入而法情圓而礙事
方而礙理圓而方而無礙有礙蓋至法而即方即圓即
圓即方即情即事即理而無有礙之者子輿氏曰規矩
方圓之至也君子行法以俟命而已矣吾所以語慶守

者具是余頓首曰謹受教及申而汐至兄自涯反呼余
曰當作江干送一詩寄我余與孝修曰諾凌潮渡三浙
霧雨且暮宿王家兜疾風驚浪寤宿而已

三十日雨發申至富陽前嘉興譚青湖明府以臬幕署
事招游觀山山峙縣東偏因高為城桐江南來勢實截
之而北有小沙逆當其衝以護萬家之縣孫仲謀父子
由此崛起良不偶然土人向未敢祠漢壽亭侯以孫氏
故有之自今始其麓是也磴轉十仞祠肖羊裘先生再

十仞許得鐘閣鐘治于元至正而款似漢叩之清越江
聲月色良夜互發當是滲骨再十仞許而祠文昌貌故
尊偉余與青湖瞻揖之環望紫薇鎖石諸山蒼茫野色
絕不似江南景物細雨濕衣引酌而別挂帆長風即飛
濤怒立不致作惡四十里宿新店

二月初一日霽發已至桐廬縣縣故一橫洲江水周之
前有筆架諸峰亘峙作朝未刻絕瀏江灘新漲總至洶
洶懼人晚上七里瀨有懷康樂孤客傷游湍徒旅苦奔

峭之句再上為鷓鴣門風濤加壯暮泊釣臺下急攝袵
以登肅謁嚴先生像像左為方玄英右為謝臯羽余曰
兩人故堪為羊裘公耳孫遂上雙臺凡歷十五盤而得
東臺顏曰留鼎一絲西臺顏曰垂竿百尺中有平石可
三十肘而羸低回者久之返步而晚雲繚繞罡風襲人
磴左孤松偃蹇如虬如龍者七舟人指對岸鬱林中為
先生墓余曰水湍山峭壑藏於此寧獨生前鬱孤亦復
死後輕奇登舟亟索篋中所有望桐官詩與孝修快讀

之蓋歲辛丑予以客部郎持節冊封淮藩歸艇夜發竟阻登眺時語已十三年往矣

初二日早至西口已過烏岑關關似展旗而偃臥瀏濤中予舟蕩焉濫瀕如象何以踰此未泊嚴州望富春驛百步許晚發州渡從渡口望郡城翼翼虹亘新安江碧若拖藍越十里宿溪埠

初三日雨帆挂大羊午及三河而風鬬宿九都口為宋十子九得雋處名范村其一為諸生以老則理學家所

稱范浚氏故有五箴膾炙人口者隔岸為仙桃山居人云往往百年一結實左為長蛇趨蛤形家者謬以此倭山靈耳其後為天子山相傳為漢長沙太守孫文臺墓業被發為居民有

初四日早至女埠午泊蘭溪縣劉滄嶼明府出訪發二
十里宿湯溪之楊埠

初五日未刻抵龍游發里許泊亭步山北之橫沙

初六日早發灘石齒齒其湍急洄澍不減七里瀨望三

衢可十五里許北岸土岡亘峙浮圖層出迤西則大石
阜圓徑數十畝為雞鳴山迤北為浮石山支分劈脈蜿蜒
稜裂晚泊西安縣

初七日發十里而蕭揖之參知以尺一來曰君子建禮
歸然靈光矣乃以一麾走萬里汲長孺不薄淮陽是其
所以為汲長孺者乎余答以仲詔書畫舫中語附候吏
去六十里泊紅橋埠則常山在望矣

初八日疾風挾雨午始至至則龔圓甫明府出訪余入

城報謁訂游西高山

初九日遂霽家僕來送者以是日反作鄉書數十玉殊
苦稠濁迄晡乃竟圓甫邀遊西高寺寺為嘉泰中勅建
制故渾朴牟尼像亦復莊靜散步登藏閣從閣磴轉者
三得積翠亭為同年唐長公所題而借腕于玄宰史氏
其西則西高峰在焉蓋常山西南北三面環而為縣西
高最傑出縣解于北山之腹而東面獨缺溪水當之隔
岸則江右諸峰層出雲際矣日旰不獲上西高從亭中

一眺呼燈踏山麓歸途距白龍洞不一里許從田塍中行過之澗水淙淙繞足下數武而得初洞口可二仞許泉瀑迸落望之黝然呼燈迹之有竇上出主者曰磴轉百餘武為中洞洞口可三仞許橫例劈裂二里許而竟厥竇稱是余又呼燈迹之度不能至又磴轉三百武許及嶺之十七而有穴下穿則向之泉竇上出者是已以無他奇輟步旋尋故步入簷參知定齋山館館後有石壑泉聲活如為引滿與圓甫別則雨絲紛如矣歸而簷

溜竟夜山城孤宿重衾為薄

初十日發常山四十里為草萍讀孫忠烈七言近體曰
身從許國頻加愛髮為憂時忽變蒼余壯其語為孝修
快讀數過步之者則王文成伯安擒寧濠南來詩也其
目云得大駕南征渡淮報于此蓋伯安爾時有勇略震
主之疑焉晚抵玉山而寢

十一日早發十里為崙溪鋪又三十里為沙溪鋪壁間
諸咏多以雞肋二字作喙余亦行自笑也又二十里為

靈溪有橋屹如三分之二中駕屋數楹暈如也又十里為廣信鄭郡丞趙司理來訪

十二日發上饒五里為五馬嶺又五里為冷水山山有洞穴稍進為天門門畔橋出云為九仙丹竈故處周以冷水城若天構然至興安旅館申刻將命倅大雨驟注輿人逸去令奴子顧興安二三游手舁籃輿踉蹌而抵弋陽漏下一鼓矣

十三日發弋陽葛溪驛雨甚西為篠簞嶺又西為簪嶺

岡脊坡陀榛莽雜出輿夫蹉蹌而行滑滑作苦及申乃
霽抵貴溪之迎恩門為元儒陳靜明先生故里晚宿行
館月色如晝散步通莊徘徊桂洲相公坊下感慨者久
之

十四日早渡蕪溪凡五里渡金沙未申間至安仁縣日
未晡發安仁之紫雲驛為孟家渡即蕪溪不二里為李
浦渡水從上清來合于此流稍狹而駛過之昏時宿白
圩鋪鋪為東鄉供頓舍

十五日行三十里俱鼓岡碎壠至湖墩得平田午抵東鄉晴日始杲西行者多從進賢入省而余友臨川湯若士念之情深遂決計走臨汝行二十里為遼唐岡岡凡十五里又五里為坪塘鋪宿

十六日早發昏霧四塞行五里始辨色所在童山迤邐溪水縈折凡兩渡薄臨汝則先一信走若士若士亦以急足遲余汝濶汝水浩泝問渡為怯舟子曰跨汝有梁凡十二門且垂成矣入館而臨川葉明生明府來為問

玉茗堂亡恙則若士已過余逆旅把臂欣然已同年蘇
刺史睂源來計契闊者十三改歲矣甫別而我郡伯吳
葵臺翁以南部賫賀歸里見枉已報謁郡伯留酌復飲
睂源所雷雨并至問所為五峰三市者頽然闌閉耳碧
澗紅泉蕪落久矣漏下三鼓若士率季子寧叔觴予玉
茗堂歸雷雨竟夜

十七日發吳家渡為輿人所紿順流而放章家石颶風
大作一穉子弄小刀狂濤中蕩漾搖曳者踰晷未克濟

若士令僕人以雙槳來脫予于厄復登岸飲石上縱談
若士曰宜州遠在數千里外青草黃茅鑄人入骨兄至
第勉飲醇醪為自支耳冬初再把臂遂渡西岸若士拱
手目余汔濟遙揖而別三十里為樟源嶺嶺鑿自泰定
間路隘甚僅度一肩輿又二十里為駐節堂則豐城界
中矣時且薄暮而卧具前發二十里為文江橋乃復行
不五里顛風暴雨霾曠四合復數里而暝輿夫走泥淖
中冷淋漬骨且躓且起覓火村落中無應者搯搯田塍

間展牀側踰時與坎窞相遇或旁臨深池瞪視微白足
二分垂在外殊懷瞎馬夜半之懼行人有呼號淚下者
余時為解勞將抵文江五六里遠望陰岡得星星火光
知奴子以擎照來復為厲風所熄踉蹌趑風雨行二鼓
宿劉氏敗屋中寒霖徹明乃止

十八日行四十里雷家渡又四十里為姚灣嶺入豐城
訪家孟同籍徐匡嶽大參是夜匡嶽移櫓行館

十九日且發奴子云輿夫未具日欲盱矣遂已復會講

于匡獄堂中匡獄以七言近體一章餞予予次韻以謝之

二十日發豐城沿江大堤虹亘積雨淖濁凡四十五里為泊濂館又十五里為樟鎮渡蓋贛江下流也又三十里為臨江郡同年顧含素以湖西憲使行部來訪太守郭華中繼至已飲含素所歸而就宿

二十一日發臨江午頓太平館晚宿羅坊

二十二日發羅坊午抵羅溪驛望仰天岡千仞翠色在

襟袖間宿分宜

二十三日發分宜二十里得洪陽洞碑云有十三竇玲瓏幽嵌石床蘿牖為仙真窟宅以雨不及入又十里度秀江則嚴氏故居發脈昌山是也及申抵袁州程太守來訪報謁畢獨上宜春臺臺為漢灌嬰宜春侯所築又云有泉宜釀故名未知孰是

二十四日發宜春十里為沙陂橋有屋覆之若回廊然又三十里為宣風館館中所次王伯安七言近體幾滿

屋壁余亦漫興和之乃發宿蘆溪

二十五日度蘆溪溪汎激客從楚廣來者順流而下抵
洪都不半旬余以陸行委頓念之色飛午抵萍鄉署篆
者袁司理王吳吾為季有同籍故同郡莫逆挽飲縣廨
秉燭作鄉書就宿

二十六日發萍鄉從此入楚境矣廿里許遇慶遠高朱
兩生問脂車何期云以正月晦乃知前途尚遙征衫故
須著破又二十里湘東鎮延茂不減一小邑又數里黃

花渡為晦庵次宋伯和詩故處又五里有坊曰古醴東
治吳楚界別于此自江右至湘東途頗滑澀淫潦漬淖
更艱行役將抵醴陵淥水隔之淥水故漉水也以橋易
名橋袤四十二丈許覆以長廊度橋而行館面江以居
有柵樊之據形家云不宜築城居然山縣不廢臨流
二十七日早發去館數百武爲醴泉井凡三眼石甃輦
整聞甘涼熨齒炎時幾浹全邑以行迫不及嘗四十里
午頓清安館雨甚十里許為白關鋪有亭暈如顏曰衡

淩環奇山水頗勝不半舍而平田中三石屹立離列位
置相傳為旗鑼鼓石亦小有致再度大小黃泥二嶺始
霽至荷塘館則湘中諸山參差層出矣

二十八日發荷塘雨如注度平岡數里為灰渡水僅方
舟耳乃兩涯山根墳起而積溜甃之者三十里至館子
堦行四十里為烟屯嶺嶺高可十仞而三起三伏者二
里許北望湘潭邑治了若擎盂旁帶一水判南北途渡
而北則取道于荆岳沿而南則衡永廣路矣晚抵縣隔

江而館越在北岸申刻同里包儀甫方領徭于此故家
季同籍好也渡江酌我館中適予同籍李宮諭四履枉
我已別六年所矣

二十九日早渡湘報謁儀甫儀甫以晚歸為妬風挾雨
所困遂不櫛沐晤衙齋中作無義味語而別過四履歸
而日且旰與孝修延望江上觀湘樓危峙其北帶以睥
睨南來岡阜綿亘百里俗呼為挂榜山故琵琶峰與祝
融峰相望為七十二峰之一也東則長沙郡城羅洋雲

母諸峰翠橫天表平疇遠樹風土夸曠視臨江而西林
莽逼塞觸途生礙至此為中湘別是一番境界矣蓋瀟
水源道州湘水源桂州合流于永故洞庭之南境總為
瀟湘及衡而會蒸于合江亭下歷湘陰界又合資沅潭
漉諸水北迤而奔赴于洞庭故湘潭稱中湘云

三月初一日發湘館行二十里抵下涉渡即湘江也有
山翼然當湘之上流者金華峰也道傍民舍多以竹為
阿棟而茅覆之支戶乃以雜木或棕櫚本皆目所未經

見又三十里午頓茶菌館館外即茶菌嶺名亦雅似又
四十里宿黃茅堡

初二日始霽發黃茅三十里逾白石嶺四山迴合高寒
在眼二十里為柘塘館距衡山縣將三十里夾路官松
大可十圍者繚繞山徑蔭映行轡上蔀白日下翳翠微
鼻端時拂拂有芬韻而間似嵐氣鬱盤之盛大江南北
所在罕覩

初三日發衡山出郭望巾紫峰不遠里許繞麓新松夾

路循江而行清駛可愛二十里為馬鞍嶺嶺頗迴而石
路新整為孝婦劉妙賢所斃又十里依田鋪道傍曾植
齋宗伯墓坊在焉又二十里飯九渡鋪十里為柳江口
乃蒸江經流也又二十里為衡州宿蒸水驛鄧玄度觀
察來訪

初四日早謁至聖先師像于石鼓書院讀禹碑副刻上
綠靜閣閣下故有昌黎綠靜不可唾一詩為南軒先儒
所書石已泐後人重摹之筆亦挺秀新剏大觀樓于會

江堂即合江亭故處也舊址頗雄勝延望城中岡巒北來將訖而突起一峰以居蒸湘二江之會窮其末有朱陵洞僅石罅中一線耳當是廩題求所為李吉甫齊映諸詩刻之西溪石上者不可得已謁諸葛武侯廟于書院左方乃發則大雨傾注幾不可步踉蹌行淖濁中望回鴈峰已不辨烟樹且暝日潦呼炬村落間時復滅沒至馬公嶺咫尺為迷叢薄翳如怪石獐如飛湍洶如倘時屬霽朗不妨遊目而淋漓昏黑觸眼成刺著足成躓

盖自文江橋之厄至此而再矣乙夜宿排山驛

初五日發排山四十里為烏符觀觀中故有無上宮主
詩及白仙玉蟾二篆蹟土人云先是以烏蛇時時啖人
作崇白仙飛劍斬之而無上宮主為純陽仙師別號篆
詩則與道士蔣暉者行十里為先忠武征曹成劄營處
建有大營寺像設甚嚴後寢則垂成且圯不蔽風雨讀
碑中所勒忠武手書恢復中原北迎二聖大指凜有生
色而舊石且泐嘉靖癸卯歲唐中丞應德復識而新之

余感賦長律十五韻末有不因絕嶠分麾檄安得陰崖
覲旆旌之句蓋龍水客為麾瘴之行蕭瑟旅中幸彷彿
此一番水木音容也又十五里上熊羆嶺蓋自江楚歷
岡陟硯半屬坦衍至此而拾級屢上矣其路自北而南
復轉而西皆從山腰中著足約高五里許乃取徑隧中
以出道傍多蠟樹其葉類吾鄉女真而黑黝過之土人
多從春初放蠟蟲于其顛徧蝕葉且盡而窠其滋以為
膏燭之籍倘亦蘭蜜之倫造化巧為生人利用者與又

三十里平田納納綴以山徑宵行二十里抵祁陽陂塘
山阜從燈影中彷彿晚憩別館館子談縣廨中多木魅
時時汨奚兒于水益中以為劇甚奇

初六日發祁陽東關環市櫛比貨貨之盛倍于前途及
三吾驛問渡波流漾潏噴沫時作所謂浯溪也烟旭中
尋中興頌石崖天齊處舟子云尚隔一舍俛仰浯山唐
亭之勝及漫郎舊宅杳不可迹至漫郎頌中指次為魯
直所洗發以託于春秋之義者亦歷落畸人一段文心

也登陸上黃羅嶺趾高而行夸約三里下平岡其脈自
縣南龍山蜿蜒而來掉脚往往逆行界屈嶺而止嶺之
南為平田綿延二十餘里為凍青館中頓少憩時值禁
烟節道中村民往往用團楮裹星火以行蓋為雨露既
濡之感杯酒漬土資也柳色鄉心見之惻然有獵戶牽
趨狗逐鹿兔健決可喜左右山麓多青蒼奇石與晴色
相映自脂車來十九淋雨及此睂眼為開二十里為楊
梅嶺達石新廣又二十里為黃婆山故平隴也有媼緣

樹下上如猿猱亦自駭目宵行十里而及永郡零陵董
令為柳州太守雲泉猶子沿街以門燈相迓及館供頓
甚設乃西行所僅有予為愧之

初七日發永州解西有瀟湘二江神祠憑軾以禮出瀟
湘門上浮橋橫亘巨艦三十五貫以鐵索架白板其
上行甚夸不知其流之迅疾也水為冉溪柳子易名愚
溪者北入湘江蓋瀟水發源九疑而合流于湘郡址南
當其分北當其合從瀟湘樓縱觀之若遊魚逆流而上

吞吐出沒而崇墉蜿蜒烟樹蘊帶以數十萬家以當
楚西鎖鑰張粵者每以諸生省試去楚遙而入粵便欲
割之為桂林附庸而張楚者以賜履之舊矐不任割亦
以山環水隈幅幘雄勝故也度芝山謁柳司馬祠殊湫
隘有小殿亦陰塞三十里為大石城山即子厚所記者
石層疊如睥睨青蒼映日其麓可十里許左右壁立而
中窪籃輿行硤中訖磨車館道始抵傍多檣樹古茂陰
映而孝修以輿人取捷忽從小徑攀峻嶺逾懸崖絕澗

渡溪而至約十里始與余會于達路又五里傍曰楚粵
分界循山徑而出則喬松千章行列道傍大可四十圍
小不下二十圍高可二十丈許其趺十餘丈而下絕無
旁枝其上乃始虬盤龍攫互相槎牙至有兩幹並上大
類連理竟難伯仲濤聲絃響雲日蔽虧其清古雄寒之
色沁入肌骨即籃輿已度而睽不忍回瞪者多為千年
以上物相傳為楚王殷分鼎時所植良不虛耳十里為
黃沙市乃逾湘而山角驛至則粵之東境全州界矣是

日北風壯土民相慶以為豐兆諺曰三月初七日南風吹過北有田不得穀北風吹過南有米啖不完亦廣右風俗志也

初八日發山角十里為黃沙舖四十里城南驛黃沙而南山阜時有逼側至此則平田夸曠而遠峰迢遞綿亘矣夾路古松接武獻奇如昨者殆無量數是日日稍烈覺有鬱蒸意固其地氣使然劉全州守來迂入城而蒼梧張觀察七澤公適以萬壽齋賀駐節全署余上謁語

余曰此中風氣夙稱惡劣飲食男女之際固當矜慎而衣被寒煖更宜節而衷之晨起必量陰晴為定則燠無大減溼無大增宜多為單衣半臂遮裒益之乃善余曰禦瘴必以酒有諸曰風霧未闐稍引蕉勺為宜劇飲之反為毛竅易張而為瘴毒所乘此最宜戒至榔實茆葉吾輩亦無庸也且云足下亦太守遷客耳何必久為禦瘴計余曰何敢以慶厯為傳舍遂謝而別午發城南驛達街延廣闌闌殷然人材物力之盛似當領袖八桂度

西闔而盤石當城西之灘江口光孝寺據其上游入寺
有無量壽佛塔塔中祖僧肉身蒙漆黝然華燈熾然土
人虔禮甚盛索其闔山志觀之多言神通幻蹟凡數卷
寺當湘灘分流之界北為湘南為灘余遵灘而行兩岸
諸峰突兀插天矗矗迎人而右壁幽嵌層出欲覆籃輿
下瞰清流徹底怪石齒齒真令人應接不暇拾級登巔
有亭曰江山一鎖進曰捲烟閣其窈處鑿石為大士閣
西行新甃石達不五里為飛鸞橋長可百丈度平田五

里再循山徑古松夾路亦復獻奇而忽遭被燔者數章
或剝鱗或剗根慘不忍視千年靈物溘焉溝斷詢之輿
夫多為販狙與士獐相勾日侵月蝕託言野燒所燼而
以數銖官錙賤售之為牟奇利計者即百厲禁不能禦
也念之慨然宵行二十里宿山棗驛

初九日發山棗古松猶昨借野燒牟奇利者亦復如昨
私念人情好惡相反故爾爾落落千丈猶正人之為國
棟也見金而不見松則此松之澹居于古道傍也于彼

何礙而不盡不快愛此松者不復愛此妬松者則彼之
以松盡也于我何礙而自不得不疾之若仇人情大都
如此矣十五里為華光館館背南而向北迤北為白面
山徭人窟穴其中者縱橫五十餘里不領于公家之版
三十里為興安縣白雲驛距驛三里許堯舜兩山相拓
如畫趾各離立羣峰矗起如筍峰各自為尊從上瞰之
如萍點于波田塍相錯無遁影者二十二里為嚴關聞
從此少雪多瘴然險隘半就夸矣壁間大署嚴關及胡

鄴東還書宋政和乙未二月二十日數字時就晡平岡
中枯茅萎塞稚子為獐賊所驚乃秉炬行三十里及大
榕江乙夜問渡知為羅洞所自出往往多蠱毒即苦渴
不可飲渡訖宿大榕館

初十日發大榕龍蟠玉泉之勝寄彷彿間耳三十餘里
至靈川縣則靈鼎在望矣嬴秦將戍五嶺命史祿鑿渠
于此遂以靈渠名而馬援南征餉道亦此焉出延望峰
巒楚楚時若火燄若劒戟者皆是徭人好鬪良以此故

二十里為甘山渡又五里為望城館崇岡大嶂耳目為
朗矣又五里為拱極樓入粵省北門門外巒岫十數浪
起都尖矗而小其壁立一似不可攀者城以萬雉橫截
之門以內朱門相比則靖江支藩也予僑居武定宗侯
樊園中仰首而望獨秀山巋然削成如卓筆然周遭環
以朱檻其凹以館其凸以亭旋聯而上又如浮圖然誌
稱郡守嚴延之讀書於此而今為靖江邸中行樂地固
天下諸藩所未有也東江陳驛尉以新遷杉青巡司來

謁輒附鄉信為報瘴游無恙

十一日謁蔡中丞及穆侍御遂有桂慶互調之議時桂林守為同籍王震澤與余俱出干弱侯焦先生之門震澤固醇謹長者吏事亦復井井旋以目眚為苦余固辭兩臺固強之余曰某走五千里入嶺西所乞休不即報可而甘受事宇下者以慶遠故也走五千里入嶺西未受慶守一日之事而遂奪同門生十郡之長則始之乞休焉者以慶遠故也即以慶遠易桂慶得矣奈桂失何

即桂失而瑕矣慶能獨得而完何調在慶守未入嶺西之日未嘗不可調在慶守既入嶺西之日則無一可凡所為期免此舉者匪徒為桂守亦為慶守也兩臺頷而許之徧謁藩臬諸臺而臬長梅公二水為容臺舊好邀坐廨中酒語曰西粵山川何當積千年之靈幸公一來其以龍水為淮陽也余媿謝曰惟有顏甲漏下二鼓乃別抵園中則夜月朦朧藩邸鼓樂甚沸可亭中尉以可酒相餉婆娑庭中側柏下呼餘杯自娛乃就宿

十二日晨起步圃東小園見牡丹一枝爛熳迎笑乃知
嶺表氣候較先吾鄉一月頗聞七星崑之勝而訓應雜
沓恐成逋客遂決計往出東江門道安仁寺江有浮橋
聯以四十巨艦約廣百仞有奇矣此為東渡岸有五侯
祠為頻年沒溺者多而新之以祈免者巷多朱門散處
天潢經嘉熙橋袤可九十仞石甃甚固折而北則崑麓
也從七星觀入中為寒陽殿左乃七星仙迹坊拾級而
上凡十二折仰睇之崑似覆蓋草木蒙蘂不見日影嵌

空處新豎一通明閣再上曲房一楹平軒三楹又轉為
玄關由左洞入廣可容百人又轉而崑稍壓頻首以入
為右洞則爽塏如大廳事中石柱二一臃腫肥重一圍
徑僅拱把上聯于石下挂于土有一石橫列屏于東隅
為游者置酒處中可容二百餘人其折旋處則亘而為
石檻穿而為石櫺滴而為石乳再拾級以上則邃而為
石洞其他如蹲如踞目所遇者未能一一指數而黝深
難測目之所不至者非秉炬不可達遂由山腹尋徑而

出復從故道向通明閣前縱觀之直徹桂城自獨秀山而南尖巒簇簇光閃爍絕無寸草株木相翳而一峰自插一位積數恰得三十峰盤礴林立誠大塊間一靈瑰之區也昔人謂山川勝北州信然

十三日發桂林由永鎮三江樓出若武林鎮海樓然折而西度城闌里許見窪田處奇石森列已而兩山對立如堵北則峰巒坦迤南則累累疊疊如劒如槊如菖蒲叢如蓮花瓣凡三十里延望皆然知為陽朔奇幻處也

憩山瓜館而西峰皆堆土麓則石也似童似獨絕無往
來人迹麓多鼓仄半高半下矗則登天墮則入淵机隄
不休凡三十五里為蘇橋驛又前五里許為竹峰渡瀕
漫屈曲前度一岡則不見後岡行迹又三十五里抵永
福縣宿公廨訖百里間眼中所見南來者三人爾

十四日發永福從襟帶三江亭登舟舟窄甚腥不可憩
順流而下中多隱石波紋沸起每一放灘疾如縱矢兩
岸崇巒挺特相送其林水佳畏處青如螺結其石骨稜

增處淨如苔滑約三十里有一峻壁屹峙初睨之若無路轉而南又為廣路島嶼縈迴卒不可究詰又三十里為里定驛巨峰浸江中多峭拔宛嵌花木繁秀殆不可數兩岸山坳皆獐所居有蓬髮者有裸體者有隱樹而窺者有憑磯而跂者有汨而浴于江者有赤乳而哺兒者皆結茅為窩採蒿而食未知其聊賴安出又二十里而月生東嶺嶺插天孤懸空江清絕四山寥廓每逗一灘水聲瀉瀉瀑濺人衣舟子云此百里內土毛從未入

貢而二十里上下絕無烟火蓋荒遠蕭瑟如是乘月行
二十里至橫塘驛大雷電雨如注冰雹戛戛與舷相鬪
夫嶺南稀雪乃雹從何來豈蛟螭故戲龍水客邪迄四
鼓颶風大作孤艇震蕩恍似富陽江夜泊時矣

十五日朝旭曛曛岸山漸平曠二十里東泉驛行三里
許有石磯蹲江中脈理麤确計以舟觸之無不焦者又
三十里為洛容縣登城僅一聚落耳前令此者為吾鄉
李孝廉名萬春固醇謹士也竟永訣於此而今為陶令

比屋茅茨一周遭而罄令坐堂皇則角巾黑甜而已聞
城外獐人不少構鬪而為媒賽所持有相齟者僅以牛
酒相罰終不樂為漢法所拘是夜月色如晝

十六日五鼓從洛容西行月色蒼涼與岡阜相映望烟
雲出沒宛若溟海落照時四十里渡洛青江兩岸山容
與赤日相閃狀如火雲二十里而渡右江右江南接瀧
水西接潯水而東則直達于桂自洛容而東水皆西南
流自洛容而西水又皆東北流蓋山脈墳起處從此岐

向爾渡後遠城不一里為柳郡東門董太守雲泉為海
寧世講好邀飲于立魚峰余曰固也當上謁黃參藩愷
衷公竣徧索仙奕駕鶴之勝而後促邴作吳儂語耳上
謁畢遂問羅池過雷塘讀眉山所書昌黎氏荔子碑摩
娑折角之字處先是柳城屢隤屢築旋復隤畚鍤者從
隤土中得碑角一之字與故痕合而城始就築嗣後貯
折角柳庫中摹搨者必得請而後碑始全亦一奇也揖
柳司戶劉蕢墓感憤久之乃就席于立魚腹中腹廣六

十餘仞與雲泉促膝語燭烟酒氣氤氲相娛從外望之如吾鄉魚燈然而其尾騰躍而上若跳波而入者聞有子厚鐫題處暗中摸索之不可得歸宿公解雲泉復來言龍水蕭瑟之狀余曰固習之矣

十七日發柳州郭外民居皆剪茅覆屋黃沙莽莽了無端際風雨驟至跼蹐而行二十里為墟市見猛人富者戴紅藤帽乘馬挾刀劒貧者片麻裹頭腰間都佩一繡緹亦其天性好鬪然也遙望松下搭歌成羣數十人一

聚其俗女歌與男歌相答男歌勝而女歌不勝則父母
以為恥又必使女先而男後其答而相當則男女相挽
而去遁走山隘中相合或信宿或浹旬而後各歸其家
責取牛酒財物滿志而後為之室不則寧需異時再行
搭歌耳從此山岡靡惡無不劒戟交牙而道間硃磔齟
齬絕少坦迤茅塞蓁穢雜以泥淖所謂行路難者寧復
儼此凡度嶺十三綿亘二十餘里每從嶺腰俯視之輿
夫三分足垂在外足下臨大壑往往千百仞而轉折處

籃輿竟當其空經此計無不心悸者次柳城縣東江驛
晚閱柳河東文宣王廟碑而後就宿

十八日發柳城西門渡江江即龍水之西來者從此為
龍水客有矣江不甚廣且挽流而上際岸為遲行五里
為琴絃山山臨大江輿行其腰徑間亂石縱橫雜以茅
穢輿夫云往時亦累石為級暴水時至仍復凌雜蓋自
萬厯初年晉陵錢侍御起莘公按柳後隨及龍水時一
加闢迄今三十年直指使者檄官吏暨獄詣柳以當

按部至學使者都試行學迄未有過而問焉歲時惟有一司李奉臺檄一行部耳坐此道路梗塞竟無甃底時二十里為龍水鋪三十里為永寧鋪則宜山界矣宜山令孫善長迓之大曹渡為離郡四十里渡口山石巖崿流沙沒脛烟霾茫茫訖渡而館大曹驛中四望山巒若筍

十九日發大曹山行逾嶺者數數而平岡為多路徑蹇澀如昨窪處流泉淙淙迄無導之成澗者其平曠處土

膏中時雜石磧宿莽與茅草相亂田塍中往往犇犇散
牧而蕪穢不治訖少耕耨者良以漢獠相雜以致曠土
彌望如此道間每十里則守望兵士荷戈挾刃不下五
六人問其額糈歲不逾一金耳十里舖胥吏以更衣易
輿告予從之則矜人獠人獠人獠人獠人駢肩側
足而睨者彌滿山谷而獠婦之椎髻跣足身裹縑布上
銳而下廣盤跚叢茅中者亦連袂成羣固生平所未經
見也日午入慶郡東門齋城隍廟

二十日寅刻謁城隍之神具文以告以辰刻進郡署銅
仁楊郡丞以被刺不出金谿江司理以攝篆授事而河
池曾州守宜山孫令君天河署事思恩蕭令君荔波葉
令君各以手版來謁所不至者則南丹東蘭那地三土
州忻城一土縣永定永順二長官司閱旬月而先後以
郵中手版來漢法之曠也久矣鄉紳自郡守縣令學博
孝廉諸弟子員而下凡若干人來謁即訂次日一謁文
廟將會講于尊經閣郡墀榕樹大可十抱枝葉幾覆堂

東西榮且盡而兩廡瓦礫積與垣齊垣僅六尺許廡脊
三人史四人半為全州產半為東粵高要產絕無土著
者輿阜門快充數而已入衙齋一木榻二板几三四竹
椅略具逾短垣桃李數株將實徑蒿三尺餘有環翠亭
支柱無恙一鑑亭凡六角半為蟻所蝕枯池畝許蛙聲
如擊柝仰而聽鷓鴣四山礫格皆耳所未嘗蝮蛇時時
掛梁壁蜈蚣尺許赤蟻寸許皆目所未嘗延望天門山
隔江而枕于郡北而九龍諸峰及南山石龍洞蜿蜒拱

揖亦一郡之勝也獨風霧四塞即晴霽非及已不開則自桂林而西比比然矣

二十一日謁文廟學博率諸生會講于尊經閣與會者郡紳王太守泳一人府倅縣令四人學博五人孝廉七人訖事而王太守賦鳳鳴歌以志其盛

二十二日謁黃文節魯直公祠讀廡下先為宜州守後以仙蛻去張丹霞先生所撰祠志已而問南樓故址文節飲憾九原處為之緬然流涕

二十三日視事堂皇胥吏抱故牘惟南丹州董界殺人
數案邕地州佔德謹四堡數案永定長官司兼攝清潭
南鄉則其獠人兩耳為江司理以謀反具申行勦旅拒
數案其他重大事情半係土官劫殺獠民構鬪狀每投
文胥吏輒報無有每及期放告胥吏亦輒報無有

二十六日太平李司理以隨巡行覈郡縣諸牘至余置
酒郭西香林院散步風林見澗水淙淙匯為方塘數畝
五六小峰玲瓏矗起迹其上有龍眼古樹六本龍蔥可

愛而下為牛欄中半竹閣糞壤幾不可近問其主曰倪
生璩生丘生余延問其契值若干積餐錢易之誅茅除
穢欲構講堂闢為書院及檢嶺西通志乃知為趙清獻
公從贛州謫判宜州羣諸生都講故處遂決意成之顏
曰香林書院而為之記已余報移贛州宜山孫令君曰
清獻公後身耶何以巧相會也且院中石梁虹亘十丈
許下空洞而上岿嶸歸為郭西奇觀者夫豈偶然願易
名為石梁書院余固辭之

四月初二日南丹等州以腆金大幣來賀且曰循往例也余即來牒斥責之仍大署其尾曰逋案如董界殺人德謹佔堡數事早為洗結恪乃位即是恭上官不得稔咎干紀以貽伊慙郡紳聞而是之作斥金歌

初四日柯恤部以讞獄檄慶入柳南丹土官捏誣夏驛丞徐巡檢以土兵二命宜償積久不結余察其借端抗拒為漢人滕子高林華交結撥置而二流官因公課起爭為夸夏大防所關難以凡謀鬪毆律論乃悉反沉案

以怵之積橫稍戢

二十五日穆侍御按柳檄慶余齋諸牘上謁侍御按兩
郡事至五月五日乃訖時為余初度董太守觴之郡齋
遂走賓州

五月初六日從遷江上林入賓時劇馬賊方橫道路戒
嚴余肩輿疾走及賓上謁聶觀察念慈公為言自柳入
賓文檄猶刻期可達自賓至慶中為南丹衛羅目渡忻
城土縣道路都枳聲教幾且不通君其奈何余曰此八

寨故處也昔賢善後肯竅實未有盡當過而問焉余肩輿詣其地一一經畫之先以立堡具覆隨上八議中有增流縣以輦幅幘者是也具如別牘

十一日渡羅目及忻城縣土官莫至誠來謁其人喬樸無所芬華余戒之謹疆守以無軼王略

十二日永定土司叛目韋萌發以其子來迓余慰遣而呼其父初詐以病辭余曰此為真叛目也速來無及于殃少頃萌發因服躍馬而至余好語寬之取來版裂片

幅殊書其上曰韋萌發速擒賊首覃朝馬到日萌發免
死且論功牽其手于幃下褰而與之且誠曰即汝妻子
無漏萌發竊睨之報曰須官兵三百余曰此又叛目語
也朝馬為汝洞奴而以謾我其歸細思之抵郡越數日
復以牒來仍請官兵三百余笑而麾之曰我與此酋以
生地而彼趨之死所佯為不深討也者而胥吏已偵而
輸之矣先是蒞慶五日萌發以長子率土兵五十餘人
謁賀其子首飾金抹額身披繡甲從兵皆手長矛衣墨

竹甲以獐酒二甕黑羊二牽為儀余受而即犒其從兵分啖之江司理從旁目語曰萌發負固六年所一旦以愛子來趣囚之一彈指不勝萬數甲兵邪數數慙慙余稔知其故笑語之曰彼以賀來擒之不武彼故父叛囚子未協笑而遣之已而牛賈有言被劫賊逋萌發寨中者胥吏曰須兵士數人趣縛之余曰無庸也以片符令壯役蔣應元往勾之應元恇不任請益伴以防旅拒余曰無庸也汝第去萌發當親飯汝仍勞汝汝食而受之

以歸已而果然從此萌發心動若有惻惻于余者及此
余經其鄉已而陽置其牒不與較而萌發遂束身以來
六月初一日季試郡邑諸生甫午垣外鈴聲珊珊然門
者曰調贛報至時方定課期訂講規于香林書院中而
忽將戒館諸生為之黯然余曰馮當世挺出于此天門
拜相山英靈未歇第努力勉旃徵夢堂故須諸君再振
清響耳

初四日香林書院落成郡紳孝廉暨學博弟子員咸集

于會而備戎莊志傳亦願北面就弟子列余為拈王文成公天泉橋上無善無惡一則為王汝中徐曰仁所相質及邇來許敬庵周海門兩先生以九諦往復之旨揭之屏間與座中互證維時各各有省而散因詢輿夫曰張丹霞仙子遺蛻安在初誤指他墓迹之不得再窮一山坳洞門僅二尺許志稱尸解之日其櫬從郡廨挾風雨飛入度何能約縮至此偃進禮之見亂石縱橫似有遺骸零雜作殷紅色余偶携三金屬莊備戎買石甃之

大書丹霞遺蛻四字鐫洞門之額

初五日宜山令進謁曰晚來永定土官聞已入城余曰
百里侯何遂以此作咄咄怪事令曰萌發其父刼省藏
逆顏行者數十年無能正法沒身而當事者僅塗塞了
事以有萌發之襲替襲替三十餘年廣轄一百八十四
村復益以清潭南鄉二里置庄十所庄各一妾妾各一
子雄長于郡南十五里中僅咫尺耳往舉事一不審輕
挑之螳動狼顧迄五六年大中丞令旗招之不來憲使

督兵圍之不出郡縣千檄百符趣之不應今不煩尺挺
囚首自服此豈易言余曰固也何以處之將囚之必逸
將不囚之非法將扶之不承將不扶之非法彼持矛帶
甲環伺而探聲息為逆順計者徧城闔皆是也此豈可
草草措置者試為余籌之令猝無以應余曰余與君且
出廳事君肅立階前余肅容而呼之以俟一時機遘若
何余遂前行立階上令立階下左方隸人大呼啓門命
土官進余語之曰韋萌發今日之事應受杖乎不受杖

乎萌發曰寧甘殺不任受杖余曰此又真叛目語也杖則向不來而無以杖今來而反叛汝謂上官順逆無別不杖則今之來可以無杖向之不來何以逃于杖汝試謂天朝法守何在且杖則明告司道憲使曰萌發受杖矣明告撫按兩臺曰萌發受杖矣從此可早結而免于解杖不任受杖則府無杖而解道杖解司杖又解兩臺杖杖且滋多而難以早結萌發始幡然解衣曰甘受杖命隸人杖之及十二下萌發曰夙患疝胞大如甕過此

難承矣余呼止之曰病者不杖姑待愈而訖法立呼承
行胥曰取供單來胥曰干連未齊余曰呼之門外即齊
耳以五六年負固土司一日而歸命案中干連無不潛
伏竊聽者第伺我之緩急寬猛以為應憎耳且緩則若
輩利而地方不利急則若輩不利而地方利夫此耽耽
者久需何為也試呼之門外果人人響應至矣隸人呼
萌發畫招萌發瞪目而問曰犯人何罪余曰坐汝叛逆
實無反形難以論辟坐汝割獐人兩耳法宜遣戍然實

為汝洞仔而汝自刎之固難繩以漢法然恢恢王土何
藉汝一夫荷戈為也當罰備荒米五百石坐以雜犯減
徒而并徒汝獐幹二人以明示恩賞萌發痛哭曰生成
之恩世世無忘遂俛首入獄瀕入復呼語曰汝知我早
結案意乎稍留之則汝幹目多計而思夤緣以行求則
不能無多費稍留之則郡胥吏多計而思需索以骫法
亦不能無多費汝第安心就獄以聽早結則法竟而思
見汝猶可以官子猶可以替萌發復汪然淚下而就繫

閱日輒具牘上黃觀察觀察杖之四十并杖其家僕各四十具詳兩臺如擬歸而萌發帖然慶郡南一面寂無咆哮聲逾年竟以病死而其子甫十七齡乃告替


十五日謁文廟諸生會講畢前請曰櫺星門外類池故有文峰五座幻出蓮朵中前馮後黎文運迭起後以得過郡守假他端怒而剗平之從此科第杳然吾師為補鍊手計將何出余曰何難右江中奇峰林立第勞五丁驅而續之將使後生毋遜前賢遂屬宜山命之匠氏余

送七孝廉北上詩有曰天門舊有峰峰在蓮岳新添箇
箇成正以此

七月初十日東東歸裝將趨贛而郡士民以挽留奔告
兩臺兩臺曰仕路挽留計無不出本官意者而慶郡挽
留計無出本官意者且早趨贛即應覲耳不早趨贛而
留慶郡一日則郡一日有慶此兩臺劄中語也故檄藩
臬詳議之已須泗城州土官岑雲漢父子會勘一案乃
不旬日先奉直公訃至以奔跣行蔡大中丞復移劄曰

我欲留明公乃以贛奪我以為慶之人不敵贛也我卒
無能暫留明公乃以憂奪我今以為贛之人不敵慶也
余為之顏甲龍水客曰余從水西抵龍水歷省四郡十
七州五縣五十三涉大江者三十凡六十餘晷多春陰
所在苦澇惟度浯溪日開霽徹晝夜耳將無元次山有
靈軫我瘴游乎差快意者一撫衡麓松色再撫全州松
色望九疑讀岣嶓碑低徊堯山下穆然堯舜禹之思焉
覩湘山寺肉身張丹霞蛻骨近于怪渡汨羅問原道館

及愚溪羅池劉司戶墓黃文節南樓近于怨彷彿嶽頂
馬祖懶殘及長源有宋諸儒故址近于逋乃趙清獻都
講故處蕪沒民間久為牛馬場以散步一眺得之遂為
慶地開千秋睂眼落講堂之日有文豹騰躍而來為莊
備戎驅材官格得以獻其徵也夫其徵也夫



粵西叢載卷四